

DE DIALEKGROEP WUNSJT UCH 'N ZIEËLIG KRISMES EN 'N GEZEËGEND NUUJJOAR!

Ooch Zieëlig Krismes

Ich geleuf ich hub uch waal 'ns ieëder vertild uëver Hoeberding en Servoas. Hoeberding en Servoas hubben hun viertig joarig al gevieërd en goan al sjtilleweg oppe gouwe broelof aa. Servoas wirkde vreuger oppe koel en noaheër in de boew. Heë trikt noe al versjeije joare va Drees. Heem is heë nog mer alleen mit Hoeberding, de kinjer zunt nuij de boet oet. Die hubbe allemoale hunne ege toezel. En ze hubbe ooch al zieëve kleenkinjer. Mit de krismes is 't ummer 'n drukte in 't huuske van Servoas, went kinjer en kleenkijer komme allemoale tegeliek op heem aa. Servoas kint doa egelik neet zoeë good teëge. Die drukte mit die daag. Me kint neet doeë wat me zelf wilt. En mer eëte, sjloeke, kofe drinke en op inne sjtool hange.

In teëgesjtilling mit vuurgoande joare zunt Hoeberding en Servoas good doer der Advent heër gekomme. Anger joare woar 't diks inne kouwe oeërlog in hoeze Servoas. 't Hoeberding makde zich mer druk en der Servoas deë wol op zien ege onbeholpe manneer doa inne halt aa rope, mer kieër op kieër ging dat sjeef. De ongerlinge irritasies komme op en in tied van nieks has-te heibel in de boet.

't Veurig joar woar 't versjrikkelik. Wie de kinjer op Hillige Oavend heem koame vonge ze Servoas mit 'n koad gezich in der sjtal en 't Hoeberding mit roeë oge in de kuëke. "Zouwe vier dat allemoal tegeliek op heem aa komme mer achter weëge loate went uch dat zoeë opdrieët"; minde 't Mia, hun oudste dochter. "Noe kiek wats-te veërdig has gemak mit dien verdulde gief" hau Hoeberding nog teëge Servoas gezumpt, "dalik komme de kinjer nog neet mieër op heem aa". En Servoas zag nieks, keek koad uëver der koeëlhof en beet van gief de piepesjtjel in twee deel. Noaheër, wie jieëderree get aafgekeuld woar, en 'ns good gegeëte hau, woar 't toch nog gezellig woeëre.

Zoeëwie gezag hauwe Hoeberding en Servoas zich dit joar neet zoeë loate opdrieë en woare in redelikke harmenie oppe Krismes aa gesjtoukeld. Ooch 't opzitte van der krisboom woar oane gevloek en gesakker gebuërd. Zelfs wie Servoas de penduul van de sjouw hoalde en Hoeberding "vuurzichtig, vuurzichtig, wat gees-te doa mit doeën" keëkte, heel Servoas zich gans ruijig. En zach: "Ich zit dit joar 't sjtelke oppe sjouw, dan kumt deë kroam neet zoeë deep de kamer i, hubbe vier get mieë plaatsj". En heë leep onversjtbaar mit de penduul noa de vinsterbank en zat ze vuurzichtig vuur 't kleen vinsterke neëve de achterduër. Bing, bing zach de penduul oane reë. "Huësje dat", reep Hoeberding. "Dalik is mich de penduul van sjaag aaf!" "Mer ruijig, mer ruijig" zag Servoas, "die hat alleen mer van binne get gesjokkeld, nieks aan de handj" en heë sjuufde de penduul get noa achter zoeëdat de gerdien der nog langs kos. En Hoeberding heel zich wiejer ruijig, ... gene heibel.

't Is hoas onheilsjpellend vreijig dach Servoas bie zichzelf wie 't litste herderke neëve 't kripke zat. En heë zat der nog 'n keërske neëve, 'n keërske van hoap dach Servoas bie zich zelf en moos zelfs 'n bietje drom grieëmele. Servoas en Hoeberding drinke zich nog 'n tas kofe en eëte zich 'n sjmauer, dan make ze zich gereed vuur der oavend Hillige Oavend!

Mit de wetensjap van veurig joar nog frisj in 't geheuge komme de kinjer vuurzichtig binne. 't leësj komme Mia en Sjr vuurzichtig achterom i. "Enne ..." zeët Mia went 't vuurzichtig der kop doer de achterduër sjtikt, "zit der veerdig vuur vanoavend?" leër Servoas get kint zigke geet aan de vuurduër de bel en sjoan Lenie en Wiel mit Joske en Marieke a gen duër. In tied van nieks is 't 'n gekakel hoe me wildj van wurdt. leër jieëderree zich gezat heët komme Karel en Marleen mit Liza ooch nog binne en sjtopt oppe opvaart inne wage mit veuël getuut: Hub en Gertie mit Pauline. "Deë verdulde gek" reupt Servoas, "kint deë noeëts op 'n normaal maneer komme!" Der versjiene de ieësjte sjprungskes in ene kristalkloare Hillige Oavend.

Hoeberding geet kofe make en Servoas hoalt de vla oet de kelder. Went heë krek boave aan de trap is komme Joske en Frenske zich noagerenne en pave de duër toe. Servoas kint nog krek de duër ontwieke en sjteet in 't zakkeduuster oppe keldertrap mit op jieëder handj 'n vla te jongleëre. "Sakkerloot gier verrikke duivele" sjrieëft Servoas en sjtuët hel mit ene poeët teëge de duër. "Maak oape ieër lamzek!" gieëft heë nog der bie. "Zoeë hoofs doe ooch neet teëge die erm kinjer te sjreije" zeët Hoeberding koad en mak Servoas de duër oape. "Of ze der ouwe de keldertrap aafduje mak zieëker nieks oet" groemt Servoas koad en paaft de vlaas oppe kuëkeduusj. "Ruijig, doe opgereege gek", keëkt Hoeberding en wit nog krek de kroëesjelevla van ene sjuver van de duusj aaf te redde.

Noa get kofe en vla ruumd Hoeberding der dusj aaf en zeët: "Wilt gier get angesj drinke dan maak ich sjtrakke nog get te eëte". De klene drinke limmenaad en de groeëte get wien of beer, Servoas hoalt zich de flesj eëls oet en sjud zich 'n drupke i. Al flot wurdt uëver van al gemoeld en de kinjer renne zich get noa in der gaard. Mer mit 't sjtiege van 't alcoholpercentage were de gesjprekke 'n bietje feller. Went Karel en Hub beginne te polletiekke,

wurdt de sjtumming al get minder Krisovendechtig. Mit roeë kup wurdt zich de woarheed gezag en dat vilt neet ummer good. Servoas deë ongerwiele al good van de eëls gepreufd heët bemuijd der zich in aavank neet zoeëveuël mit. Mer opins wurdt 't heuëm toch teveuël. "Zigk, kan 't neet 'n bietje ruijiger!" reupt Servoas mit doebele tong en huijt oppe dusj dat de glazer davere. Hoeberding kumt oet de kuëke en zeët: "Servoas, ... mos-te op zonne daag wie huuj zoeëveuël zoepe doe klotskop!" "Mer nondeju" reupt Servoas, "die remmele zint zich aan 't sjtrieje en ich krieg 't noa der kop geworpe. 't Is hiej in de boet ummer derzelfde zeek. De kinjer zunt hillig en der ouwe kint verrikke!" En heë sjudt zich nog 'n drupke i.

Ongerwiele komme de kleenkinjer i en beginne te lammendeëre dat ze hunger hubbe. En of 't Mia noe zeët dat ze nog effe motte wachte, 't hulpt gene zak. "I plaatsj van uch zoeë te sjtrieje kint der beëter die poete in 't gareel bringe" zeët Servoas teëge Karel en Hub. "Wat bis doe vuur inne opa" krieët Hoeberding, "dat zunt dien kleenkinjer, geen poete!" En Lenie zeët: "Zigk pap, went vier dich teveuël zunt kans-te 't ooch op 'n normaal maneer zigke, in plaatsj van dich te gedrage wie ene durpssjtier." "Has-te 't weer veërdig krieëge?" sjild Hoeberding tot uëvermoat van ramp noch derbie.

"Ich huër 't al", zeët Servoas en sjud zich nog 'n eëlske in. Wankelendeëre sjteet heë op en zeët: "Ich weet went ich teveuël bin!" Heë wilt zich omdrieë en verluust zie eëvewich. Servoas begint mit zien een vrieje handj in de loch te maaije om zien eëvewich te houte ... 't hulp neet. Mit ene zjwierige drieëj vilt heë mit zien ganse vermeuge noa der krisboom i. Effe is al moessjtijl Servoas ligkt tussje dennetek en krisbul i en ziene blik vilt oppe sjouw.

Doa brent 't keërske en 't goodgeële leech vilt op 't kripke. Ene werme, gulle glimlach van 't kiendje wurdt de kamer i geworpe. Krek es of heë zigke wilt: "Serveuëske, Serveuëske ... der is nog hoap!"

"Ooch Zieëlig Krismes" zeët Servoas en sjravelt op.

Wiel Roeselers

De zin van Krismes

Ins per joar is 't zoeëwiet,
Dan is 't weer de kristied.
Zuus-te de luuj weer wie gekke gelle,
En allerlei duur dinger besjtille!
Ze dinke dat ze alleen mér recht kinne doeën aan dit fieës,
Es 't cadeau en 't eëte duur is van pries.

De echte boodsjap wurd oet 't oog verloare,
En dat is noch ummer dat 't kriskindj is geboare!
Gans einfach in inne sjtal en oane duur dinger,
Dus houd wat dat betruf aan der pols inne vinger!

Dink ins noa uëver dat kriskindj dat os de vrede kumt bringe,
En woeë vuur vieër krisleedjes kinne zinge.
Dat de rus oppe welt wilt beware,
En os besjermt vuur alle gevoare!

Dus truuk noa de basis is 't devies,
Went krismes is neet bedoelt om vuur jieëdere pries.
Anger luuj mit cadeautjes of eëte af te troeve,
En ze op die maneer te sjeete onger de doeve!

'n Cadeautje huërt d'r natuurlijk waal bie,
Mér dink dizze krismes ooch inne kieër,
Dat de boodsjap van krismes
besjteet oeët hiel veuël mieër!

Ron Logister.

Drukke daag vuur Krismes....

Dat woare nog ins drukke daag, die daag vuur de Krismes.

't Ganse hoes woeëd ónger heng genoame.
 Gepoetst, gesjroebt en geboend.
 Sjtuk vuur sjtuk woeëd de lange boodsjappelles aafgewirkt.
 Ummer mieë sjpanning óntsjtóng, sjpanning die mit de Krismes tot óntlading mós kómme.
 Teëge de sjloes van d'r letste daag vuur de Krismes wiste vier dat v'r nieks vergeëte woare en alling nog mer
 hoofde te wachte óp d'r Pap.
 D'r Pap mós ummer de letste hank legke aan de vuurbereidinge van Krismes.
 Dat doog heë al joare mit 't ópzette van d'r krissjtal.
 Sóms doerde 't wachte óp d'r Pap waal grellig lang.
 Vier zoate dan al sjtóndelang in ózze zóndigse anzóg te wachte.
 't Woar noe eemoal neet angesj, d'r Pap mós geweun wirke bis dat heë kloar woar.
 Wen heë dan endlich heem koam, dan sjarrelde heë get plenksjkes en letjes beiee, en vier vroege ós dan ummer
 aaf wie heë doa in hieëmsnaam inne krissjtal van kós make.
 Heë zeëgde en heë tummerde tusje 't vloke durch waarechtig inne krissjtal inee.
 Vier woeëde dan nog de sjtroat ópgesjikt óm bie de buurlüj get klimóp van de moer aaf te klauwe, en ing oer
 sjpieëter wirkde heë dan mit get rotspapier en d'r geklauwde klimóp zien wirksjtuk aaf.
 Dan froemelde heë nog èè lempke van d'r krisboom durch 't hingesjte van d'r krissjtal en kloar woar de krib.
 Nog effe woeëd zich dan gesjtreeë uëver weë noe egelig d'r Jozef of d'r sjieëper woar.
 De drei kuëninge en d'r kamieël bleve in de doeës bis noa neujoar.
 Dan drieënde heë aan d'r sjlinger van ózze ouwe versjlieëte platesjpieëler en lag doa gans vuurzichtig ing plaat
 óp van d'r Karl Schriebl mit Stille Nacht óp ziene Wiener.
 □ngertussje wesjde heë zich en zóng mit d'r Wiener mit.
 Ing hoof oer sjpieëder zoat heë mit zien zóndigse pak aan, en glimmend van d'r brillantine in de nachmes.
 Dan woar 't inins Krismes.

Thei Janssen †

Krisnach

Loat os d'r vree veule dees nach
 D'r vree va eevoud en oane kaal
 Want ozze weëg lupt gans onverwach
 Noa inne erme sjtaal

Loat os sjtil zieë in dees nach
 En zjwiegend loestere
 En wie ummer onverwach
 Zich i eure leefde mage koestere
 Jan Halmans

Krismis-trend

Plastic keërse mit elektrisje vlam
 Op der boom geklemp mit greune klam
 Breëkbare bul in all bontje kluëre
 Ekele, paddesjteul allerhandj figuëre
 Een bontje mengeling in leech zoeë kloar
 Onger 'n waas van ingelehoar

Doa onger 'n sjtelke van birkehoot
 Hoe teëge aa get wintjergreun zoot
 Van 'n sigarekiske 'n deëkske drop geklop
 drombie get mos van 't pannesjop
 in 't sjtelke zeëgmeël of witte zandj
 en dan nog get boomsjors langs de kantj

Dan koame giepse beelde der in te sjtoa
 Dat woeërd mit zurg hoas plechtig gedoa

't Kiendje woar 't ieësjte aan de rie
En dan Maria, Jozef, os en eëzel drombiej
De herdere mit sjeuëp en hondj get wiejer aaf
En de kuëninge die wachte hunne tied nog aaf

Tek mit groeëte denne-eppel aan de moer
En hie en doa get zilvere lametta der doer
Inne knoa watte dat leek waal 'n snjieëvlok
'n Lintj mit zilvere bul aan de sjoande klok
'n sjoal mandarijne en een mit nuët om zelf te krake
Bie de teijer 'n fien tekske huls om 't aaf te make

Dat woar joar in joar oet 't zelfde ritueel
Hoe-ste noa oet keeks dat wat dich geveel
Gene sjtres me prebeerde 't geveul te vange
Uëvertuging woar belangriek, de sfeer, 't verlange
De luuj woare bezig mit zichzelf te geëve, te ute
En neet uëver de ruk van t sjtelke te sjtute

De winkele hange vol, jieëker joar angere prul
leësj woare 't roeë, dan zilvere, dan bontje bul
Ummer vreuger, sinterkloas geet achterop rake
Omdat de winkele wille verkope, omzit wille make
..... En noe, noe wurdt jaarliks noa de winkel gerent
Angesj, och erm mist doe der litste nuje trend
Wiel Roeselers

Krismes

V'r herdinke mit de krismes dat Jezus Christus is geboare,
Doeër dat te doen wete v'r dat v'r nog neet zunt verloare!
Es v'r rond 't vredige tafereel rond d'r krissjtal zitte,
Is 't good es v'r ins hieël good op de boodsjap zouwe litte.

De boodsjap van krismes is ooch: vrede op dis welt,
Loate v'r os verdrage en neet ummer mit veuël geweld,
Stjrieje vuur os geliek of 't ummer mieër mach kriegende geld,
Jiëderree is geliek, es v'r dat allemoal beseffe is d'r een beëtere welt!
Ron Logister

Kris-Beum....

...hure toes in de natoer, of beëter gezag, boete, in d'r gaad, in ing park, in d'r busj of zoeë mar langs d'r weëg of
langs ing baak, of geweun midde in de wei.
Eke, beuke, kastanjele of denne, of kót-e-weg alle beum , behalve sjlaag of vleesjbeum.
Doa zal toch jieëker geweun dinkende miensj mich geliek i geëve.
Ing oetzundering weëd gemak mit Krismes.
Dan mótt inins inne boom 't hoes i gehoald weëde.
Ing dennebeumke of get wat dr 'op liekt.
Want dat sjteet gezellig en zoeë fieëstelig.
Doa weëd ing apaat pleëtsjke vuur vriegemak in de gouw kamer die egelig
al vól sjteet mit zjwoare eke meubele.
In d'r ek, woeë geweunlig d'r moeëneka sjteet, dan sjuët zich ginne zoeë vlot draa, en wen'ste dat noa ing daag
of drei toch nog dees, dan ritsele wer ing paarhóngerd gram dennenolde noa ónge.
Zoeë is 't, v'r hoale de natoer in hoes, en 't ruukt óch nog zoeë lekker, zoeë 'ne
krisboom.
Sjtjel uch ins vuur, i gans Holland , mit zoeë óngeveer veermieljoeën famielies,

woeëvan de haofsjeet zich inne krisboom aasjaft.
Dat zint effe tweeëmieljoeën dennebeumkes die draa mótte geleuve vuur tweeë
weëke gezellig en vroeëm plezeer.
Óch al zit d'r boom diek in zieng nolde, oane versering d'r i is d'r boom "kaal".
De natoer hat zieng werk neet good gedoan.
Vier miensje make dat werksjke waal aaf.
Dus kope v'r böl, sjingere, inge sjpits, ingelehoar, krenskes, klöksjkes en metere
elektriesje krisboomverlichting.
Vreuger gebroekde vier van die blikke knieperkes woeë echte keëtskes ummer sjeef i hónge en ummer 't gevoar
besjtóng dat d'r ganse boom góng brenne.
Dus noe hange v'r d'r boom vol mit lempkes in 't roeëd, blauw en wit.
D'r sjpits van óp zie mins viefentwintig euro hingt ummer sjeef.
Doa kriet d'r boom de sjood van.
Ózze ouwe löbbes op veer puëtjes kriet ze óp d'r zak ómdat heë d'r boom gebroekde es pispoal.
Egelig hat deë ouwe löbbes groeët geliek.
Heë mót zoeë lang durchgoa bis dat d'r krisboom oetintelig versjwoende is oet
Ing ómgeëving woeë heë neet i toes huurt en d'r moeëneka wer op zieng vaste plaatsj kin sjtoa.

Alvas sjoëën Krisdaag en ing gelukzieëlig nuijoar in ing greune welt
wunsjt uch

Thei Janssen †

Nuijoar

Ee nuijoar kinst-te beginne
Mit de sjunste kleier aa
Dat is waalrichtig gemuutlig
Mar doa hast te zoeë wenig aa

Ee nuijoar kinst-te beginne
Mit ing groeëte tuut mit geld
Mar dat hat wieëneg weëd
Es ginne va dich hélt

Ee nuijoar kinst-te beginne
Mit ee sjoëën gleëske wien
Mar es 't leeg is, wat dan nog?
D'r zal waal get beëters zieë

Ee nuijoar kinst-te beginne
Mit ee gans sjoëën gedich
Mer 't betste is nog ummer
Ee begin mit ee vroeë gezich
Jan Halmans

Krismis

Wie leëg is soms os hart.
Wie leëg is soms de welt.
Kil en koud is al om dich heër.
Vervult van aafgunst en geweld.

Loat 't verhoal van Krismis.
De gedachte aan de Hieër.
Os vervulle van wermte.
Os de weëg wieze, kieër op kieër.

Wiel Roeselers

Ing sjter

D'r sjnei kumt
durch d'r d'r wink gejaagd
mien vinster langs gewiemeld
ich huur
wie durch die wattewelt
van wieds ing klöksjke biemelt
ing hoëge toeën
ing lieëge toeën
es gong get touw en oape
dat deet mich
of ich wil of neet
de oge touw en sjloape

D'r wink huurt óp
't sjneit neet mieë
't kómme sjterre winke
ich zieën
juus boave ós ouw kirk'
ing ganse groeëte blinke

Woëvuur hat boave Bethlehem
deë sjtroalesjter gesjtange,
wen deë noe ins
't kós toch zieë
bis Broenssum woar gegange ?
Thei Janssen †

Nuuj Joar

'n Joar sjteet weer op 't punt om te goan,
De tied blief noe eenmaal neet sjtil sjtoan.
Ooch al zouwe v'r dat waal ins geer wille,
Dat hove v'r os joa neet te vertille.

Mer 'n nuuj joar sjteet op 't punt van beginne,
'n nuje periode in 't leëve, kloar om te ontginne.
Wat zouw os dat kommende joar goan bringe?
Zouwe v'r 't ganze joar van vruid kinnen zinge?

Allemaal neet te beantwoerde vroage welle in os op,
Allemaal goeije vuurnummes zitte in ozze kop!
Loate v'r 't mer allemaal op os afkomme,
En hope dat os dat nuje joar good zal bekomme!
Ron Logister

In zurg verloare

't Ouwe joar dat lupt aaf
't Nuje wurd geboare
Noe is de welt kakelbontj
Murge weer in zurg verloare
Wiel Roeselers

Wunsj vuur de fieësdaag en 't nuje joar

Vieër wunsje uch allemaal sjoeëne fieësdaag,
Dat 't uch allemaal veuël bringe maag.

Vuur 't nuje joar nieks dan good,
Verlees in jjeëder geval neet de mood.
't Belangriekste is toch een goeije gezondjheed op de welt,
Vieër hoape dan ooch dat die vuur uch allemoal is besjiilt!

En vuur sjtrak: inne hieële sjoëene vastelaovesdied,
Geneet d'r van, want wat-ste gehad has, rak-ste noeëts mieër kwiet!
Ron Logister.